

Aafiaga mai le Tolauapiga a Isaraelu

Aafiaga #1

Na manatua e Elder Siaso A. Samita (1817–75) o le Korama a Aposetolo e Toasefululua nisi o tulaga na feagai ma le Tolauapiga a Isaraelu i le taimi o la latou malaga:



Sa tauaveina e le Perofeta o Iosefa se vaega atoatoa o le tiga o le malaga atoa. E faapoopo atu i le vaaiga o le tausiga o le Tolauapiga ma le pulefaamalumu ai, sa savali o ia i le tele o le taimi ma sa mafoefoe o pa'u o vae, tafetotoi,

ma tiga vae, o se taunuuga masani lea o le savali mai le 25 i le 40 maila i le aso i se tauvevela o le tausaga. Ae i le taimi atoa o le malaga sa le'i tomumu lava o ia pe tuuina mai se faitioga, ao faitio atu ia te ia le toatele o alii o le Tolauapiga ona o le tiga o o latou tamaivae, mafoe o pa'u o vae, umi o le savaliga, utiuti o meaai, leaga o le tulaga o falaoa, leaga o [falaoa saito], manogi [leaga] o pata, malosi o le hani, o fasi puua ma sisi ua i ai ilo, ma isi mea faapena. . . . Ae o i matou o le Tolauapiga a Siona, ma o le toatele o i matou sa le faia ni tatalo, le magafagafa, faatamala, le faalogo, valea, po o le tiapoloa, ae peitai sa matou lei iloa ia mea. Sa onosaia e Iosefa i matou ma a'oa'o i matou e pei o ni tamaiti. E ui i lea, e toatele sa i ai i le Tolauapiga e le'i muimui lava ma o e sa sauni i taimi uma ma le naunauta'i e faia e pei ona sa finagalo ai lo matou ta'ita'i. (Siaso A. Samita, i le *A'oa'oga a Peresitene o le Ekalesia: Iosefa Samita* [2007], 287–88)

- Aisea e te manatu na matua eseese ai le tali atu a sui o le tolauapiga i ia lava tulaga e tasi?
- O le a se mea e mafai ona fesoasoani ia i tatou e tausia ai se uiga faaalua lelei pe a tatou feagai ma faigata i a tatou taumafaiga e mulimuli i le Faola?

Aafiaga #2

Faitau le Mataupu Faavae ma Feagaiga 103:20 ma le saunoaga lenei a Peresitene Heber C. Kimball (1801–68) o le Au Peresitene Sili:



E ui lava ina sa faaauau pea e o matou fili ona manavaina mai le taufaamata'u o le faatupu vevesi, sa matou le fefefe lava, pe sa matou tau faavaivai e faaauau la matou malaga, aua sa faatasi le Atua ma i matou, ma sa muamua

atu Ana agelu ia i matou, ma sa le maluelue lava le faatuatua o si a matou vaega toaitiiti. Ua matou iloa o agelu o a matou soa, aua sa matou vaai ia i latou. (Heber C. Kimball, i *A'oa'oga a Peresitene o le Ekalesia: Iosefa Samita* [2007], 288–89)

- O le a sou manatu o le a se aafiaga o lenei faamanuiaga ia te oe pe ana faapea o oe o se vaega o le Tolauapiga a Isaraelu?
- O a nisi o auala e fesoasoani ai le Alii i Ona soo e faia mea faigata i aso nei?

Aafiaga #3

Ina ua na o se aso o le malaga a le Tolauapiga a Isaraelu mai le Itumalo o Siakisone, e toailima ni alii sa i ai ni auupega na o atu ia i latou. Sa mimita atu nei alii e silia ma le toluselau isi na agai atu e osofaia le tolauapiga. A o talanoaina e tagata o le tolauapiga le mea e fai, sa saunoa le Perofeta o Iosefa Samita, “Tutu ma le filemu ma vaai i le faaolataga a le Atua.”

I le luasefulu minute mulimuli ane, sa palasi ai se timuga afā mamafa i le tolauapiga. O le afā na mafua ai ona pa maualuga le vai o se vaitafe lata ane, ma taofia ai o latou fili mai le sopoiaina ma le osofai'a o i latou. E toatele tagata o le Tolauapiga a Isaraelu na maua ni malutaga i se tama'i falesa na lata ane. Ina ua mavae sina taimi, sa ulu atu Iosefa Samita ua pala i le timu i le falesa ma alaga atu, “O loo i ai le Atua i lenei afa!”

O le taeao ina ua mavae le afā, sa maua ai e tagata o le tolauapiga o latou faleie ma sapalai ua susu pala ma faataapeapeina, ae sa leai ni alii na osofaia (sii mai ma aoteleina mai le *Au Paia: O Le Tala o le Ekalesia a Iesu Keriso i Aso e Gata Ai*, vol. 1, O Le Tagavai o le Upumoni, 1815–1846 [2018], 203–04).

- Ana faapea sa avea oe ma se vaega o le Tolauapiga a Isaraelu, mata na faapefea ona aafia ou lagona e uiga i le Perofeta o Iosefa Samita?
- O le a se mea e mafai ona aoao atu e lenei aafiaga ia te oe e uiga i le Atua i taimi faigata o lou olaga?